

## 2 Petoro

*Nene Gege So Masi Tanik Maine So Togogole  
Manjem Paki Nei Borikinane Don Qepapkaikene*

<sup>1</sup> Simon Petoro, na Yesu Kristo wane qelit nei so aposolo.

Noŋo koboboine Anutu so ma menaŋ ma menanŋe Yesu Kristo oŋo mali malip lewine suaine, nene nebonge, yewaka nene nibonge, noŋo kibi iwa qe nibonmaile.

<sup>2</sup> Nene wetŋineŋo Anutu so Yesu nenze Waomze dere wetka okankamami, wane wet pese so peamŋo maine nŋano watke payake.

*Nene Anutuŋo Nedora Newanŋonge Enjine  
Biŋek Nebuke*

<sup>3</sup> Anutu wane zonomŋo yeye kine kine korop nebonge, nene gegeze maine gekenane wetzeŋo nedora newanŋonge, eŋe detkakonane qeli ewe zonom so enjine mayakatne, ea nŋenane biŋek qe neboniakane nedora tebanŋonge. <sup>4</sup> Ene numa yaleoken okangi paki, don biŋekine kakapa so lewine suaine mo neboniakane rake, ea nebonge. Wane mete zamotine korop iwa ea wane ra more nene maine kepeo bailalaŋ matali matali pamaike, ea kakakka arikei, paki sari Anutu wane masi tanik ea makei. <sup>5</sup> Kinemde ea wane nene mauluke masi tanik maine ea mali malipŋino takotkekei, dereret eaŋo masi tanikŋine maine eao takotkekei, <sup>6</sup> dereretŋine eao koto wane sawe gege takotkekei, koto wane sawe gegenine eao

togole togole takotkekei, togole togole njine eao meje mejen wane ewe ewek takotkekei. <sup>7</sup> Meje mejen wane ewe eweknjine, eao kima gegenjne eao yemo wet maep takotkekei. <sup>8</sup> Kine kine korop iwaņo njinano zok manerop watke payakeo, yemo eaņo baņ njibuki ewekeu paki, wet dereretnjine suaki, Waomze Yesu Kristo detlukkakei. <sup>9</sup> Ņo mane eņe ea mi ma geakeo, yemo eņe deine pilik pilikine, yalinane kine kine mi kamaike, so eņe alakan borikineine sauke mauluk okankake, ea wane mo nigetkake.

<sup>10</sup> Eso ea wane kimakopne, njine koso manerop sorin borin okane more togole togole maratkau, Anutuņo eņine binjek ma wesak njunge, ea wane wele wakonlukeake, njine yale okangeiwo, yemo njine mi ket rasuwarekei. <sup>11</sup> Numa iwa yale okanbi, njine baņ korop rakok njune more numa lalage njibongi, Waomze so Ma Menañ Ma Menañze Yesu Kristo wane gege togon Mat urum koto waketkei.

<sup>12</sup> Kine ea wane, na naso baņem tanik manik iwa wane wet qelot don njidan okanmaile, njine ea mo detkoi, so don wele makoi, ea mo malilipke ma gemami. <sup>13</sup> Na weku wetkemaile, yemo noņo maine njinane wet dereretnjine kine kine iwa wane kito wirike njidan okanikale, kepe solanerop wisika gemaileoka njidanbe menageake. <sup>14</sup> Na mo detmaile, mi azonņi nasomde bamgoka na kepe solane iwa qeliņkaikale, Waomze Yesuņo ea wane mo didiwoka nolatke. <sup>15</sup> Na baņ ea wane numaine mane mauluke ra qelaņan njidangale, na seukewe, njadino njine don iwa korop naso baņem wetke magekei.

*Kristo Kibi Qeli Ewe Zonominane Qelajan Wakongi Deenejo Kakoi Ea Wane Don*

<sup>16</sup> Nene nei dereretko n̄ine nemu kisi yewa ma more Waomze Yesu Kristo zonominerop sari lotkeakane mi n̄idangone. Nene n̄enze deze qominejo qeli ewe zonom qelajanine kakapa suaine ea kakone. <sup>17</sup> Nene yewa metnem, naso eao Anutu Magak, eje bakom mawa mawa so qeli ewe zonom qelajan sunka mange, naso yewao weti Qeli Ewe Zonom Qelajan Suaine kotinojine bokawoka mane Yesu wano sarike, eajo iwa yale rake, “Iwa yemo nae gipon maepne, na en̄ane simile nanlukmaike.” <sup>18</sup> Nene n̄enze ketzeno don iwa qeliwojine ketki detkone, nene en̄erop wenen̄ bonagao wa Yesu metke, yewao gekone, naso eao don ea detnem qeliwo n̄ine Waomjo raki sarike.

<sup>19</sup> Eso ea wane, nene propet edo don rakoi, ea detnem wele okan okanmaike. N̄ine ban̄ en̄ane don ea wane urataine mauluke mau paki, yewao wetjine more gekei, onoka wane, ea yemo lam yale panamango lawe okoramanki, Yesu zinge sariake, naso yewao kepe qaeki Yesujo sako wane serekin qelajanejo kotojine lawe qelajaniake. <sup>20</sup> Kine kine korop, ea wane kutno yemo iwa yale desikei, nei mane eje onomka Propet en̄ane don Anutu wane Papiao qekoi, ea wane kinemaine mi rayake, midakaka. <sup>21</sup> Don rokop ea nei en̄ene wetkojine dere lilikeu paki, mi qe gekoi. Yemo propet nei eje Asu Koboboineno tewek one more ebu wieki eje don yewa Anutu wanojine sariki dere ra wakone gekoi.

## 2

### *Kito Njebon Njebon Isisine Enjane Don*

<sup>1</sup> Propet isisine enjane mokaka Israel nei njerep enjane keueno wakone gekoi. Rokop yewaka kito njebon njebon isisine ban njinane keu njino wakone gekoi. Enjane ban matali matali ma wakone more isi don ea ma wakonikei, so Waom Yesuŋo sot turuŋene qekokke, enjane bisopkakei, eso enjane yale edomka okane tebakau matali qetali wakonongi eaka mida warekei. <sup>2</sup> Eso enjane yale okanbi, nei loutne enjane enjane tanik manik qotkoine ea kau paki, enjane numa ea mogare arikei, so onoka wane, enjane masi ea okanikei, ea wane kepe nei njerep enjane numa wele ea wane njade don raiki. <sup>3</sup> Kito njebon njebon isisine, nei iwa enjane wesi abonj wane bailalanj zok magemami, ea wane enjane ban enjane wetkonjine isi don kine kine loutne njidangei, eamo isinjunbi paki, njinano njine wesi abonj makei wane yale okangei. Ea wane Anutu enjane enjane kine ma wakone more turuŋine ebo ebon enjane mo maulukke, so enjane Mataliongi Mida Midaene, enjane wisika tomaonge pa sariakane!

<sup>4</sup> Anutuŋo anjelo borikine makoi, enjane mane mi lolonjone, midakaka. Enjane siluŋ ma peikki gerep sorao ketkoi, yewao mulap togogoleŋo wokom one more wareongi, panaman kotino, nasoo Anutuŋo kineene ma wakone more turuŋene eboniakane tomaka metmami. <sup>5</sup> Anutuŋo kepe sogine ea mane mi lolonjkake, midakaka. Enjane siluŋ raki kepeo doku qakum wakone more, enjane nei Anutu midaine, borikine ma gekoi ea korop engu wareke. Noa weku enjane koboboine gege

ea wane don rara gekane, eņine so ņei ņerep sewen seseongi, waetne gekoi. <sup>6</sup> Anutuņo Sodom so Gomora, mat suaine etke, siukkeik wane raki, gerepņo ezo mataliongi, siukwarekoi. Eamo ņado Anutu midaine geu, masi daleo wakononiake, eņane qaka ea maki ketke. Ea kaņem paki desikene. <sup>7</sup> Lot eņe ņei maine, eņe ņei numa midaine, eņe borikine mado madoņine gamu gamune ea mageu, eawane qom wikile zok dere geki, Anutuņo seseka more qesiņkake. <sup>8</sup> ņei maine yewa, eņe eņane keueno geki paki, kaiweine kaiweine borikine kine kine zok manerop mau onge, so detongi paki, wet dereret so kotine maine ea tanik manik borikine okangoi, eaņo ongi wikile zok mange. <sup>9</sup> Eso yalinane Waom eņe mo detmaike, ņei maine liwe liwekoņine makok oniakane, ņo ņei borikine mama wareongi, wikile dere gemageu ari Naso Suaine eao kineene ma wakone turuņine eboniakane. <sup>10</sup> ņei ea weteneņo borikinane bolam yale laweki, nalekine tau okanmami, so Anutu so qeli ņei wawaine ebu ket biraon okanmami, ņei yewa eņe mulap urum togolo biraoniake.

Kito ņebo ņebon isisine iwa eņe kaetene midaine so wawaineene teine so weti qeliwo zonomenerop gemami, eņane eweene mi kito okanmami, eņe ewe mabaik okanon okanmami. <sup>11</sup> Aņelo eņe manerop togogole so zonomene zok kakapa suaine, kito ņebo ņebon isisine iwa eņane rokop yuan kamaike, aņelo eņe Waom wane kaitko mi dere worik onbi paki, kineene ra wakonon okanmami. <sup>12</sup> ņo ņei iwa eņe wetņoka okan okanmami, osom zubaine wakonbi ebu

more engu okan okanmami, eņe yale. Eņe kine kine wane kine mi detpi paki yaup qaisikka okanmami. Neı iwa eņe baņ osom zubaine mida sololok okan mami, yale mida sololokkei. <sup>13</sup> Eņe wikile marat kakeiwane borikine kine kine makoi, ea wane turuņene eņe baņ wikileka maratkei. Eņane simileeneņo yemo eņe kaiwe suaino epa Waom ma nene, so eņet ore ore, so-laeneņo simile desiakane batne okan okanmami, eņe gamu gamune so kotoene di panaman gorop kauke geu paki, earop njanano takotke nara nema nema, so simile isi numaene, ea mogare isinune okanmami. <sup>14</sup> Eņe kine kine natne onikeiwane mi on okanmaike, eņe nrep wenip yau yaup ma okanmami, eņeka onikeiwane on okanmaike. Eņe borikine nāt qeqine makei waneka on okanmaike. Eņe nrei setene pelekakatne ea iwen onbi ari suba bano waketpi engu okanmaike. Kine kine yalinane qom riwe riwe eamo okan mageu, wetene ma qotkeke. Neı yaline eņe mo Anutu wane soa bano waket warekoi! Eņe baņ suba yale wikileka makokki ket edoyake. <sup>15</sup> Eņe numa koboboine ea qeliņ kawareu paki, numaene ea qeyau arikoi. Paki eņe Balam, Beor gipolane kie tapotine ea mogare arikoi. Israel wane naba eņe Balam wano ari rakoi, “Ge Israel nrei nrep soak onnom, nene wesi ginikene.” Ea wane eņe wesi wane simileine zok manerop pa mangane Israel eņano borikinane lewine mayakane soringeke. <sup>16</sup> Pakiso borikineinane ra more rawetkake, eņine dogiņo nrei don yale raki paki propet ea qelan masi mayakane okangi kitatkake.

<sup>17</sup> Neı ea eņe doku deine zip ziune yale, eņe

kezonj momo suainenjo puangi wele midaine yau yaup arimaike, yale, Anutuño nej yaline enjane kepe mat gekei wane binjek qe ebonge, yemo panaman yewao njik qisilik kito pamaike. <sup>18</sup> Ene wawaine don so qelanj don, wele midaine ea ra okanmami, so kelok more nej njerep isionbi sari wekuoka qeturageu paki, qomene riweki bailalanj mawakone more, solaenenjo borikine kine kine qotkoine, ea ma okanmami. Yale okane more nej natne muselemde qelanj gege so tanik manikene qelinjakoi, ea waranj onbi koso ari enjane masi tanik qotkoine ea mogare ari okanmami. <sup>19</sup> Ene edane ra okanmami, njine yale okanbi paki mulap midaine geu kine kine manenjo mi njibu ket birañuniake. No enjane yemo bori more mida sololok, oka okan tanik manik ea wane qelit qe qe eanjo wakonongi geu paki, don ea edan okanmami. Nei mane enjane kine kine manenjo maket birakakeo, yemo enjane qelit mama okane geake. <sup>20</sup> Nei enjane Waomze so Mapi Mapitze Yesu Kristo wet dereretenenjo qotka geu paki, kepe wane kine kineine qotkoine eanjo koso manerop ebu ket biraoniakeo, yemo nej yaline enjane gege mageene, ea alakanka eamo nigatnemde borike, no njado gege mageene yemo manerop borilukeake. <sup>21</sup> Ene tanik manik maine ea wane numa koboboine, ea mane detkakoi ra, yemo maine menanj lukki rap, yemo enjane detwareu pakimo numa kunenjine ebonge, ea kakakka njadekka arikoi. <sup>22</sup> Masi iwa okangoi, eanjo sikan njonmaiike, yemo Papia sogino don ea wele okanmaiike, “Kasi mane enjane madonji ket, eaka koso zinge ari nemaiké,” eso “Berek

mane eņe doku tauke, eaka koso zinge ari nalek taumaike.”

### 3

#### *Waom Sariakane Don Nasoine*

<sup>1</sup> Kima maepkopne! Iwa yemo nanane kibi atak etke iwa qe njbonmaile. Kibi etkeka ea wane kotino na liwekka more dereret njnane kotino wetņine gununutne ea ma wisikaemaile, yemo miti don iwa korop desikeiwane qe wirike njbonmaile. <sup>2</sup> Njine propet koboboine edo mokaka don rakoi ea so don togon wane numa, Waom so Mapi Mapitzanoņine sarike, ea aposolo kopņine edo njbongoi, ea dere gekei wane na wetke njbonmaile. <sup>3</sup> Mikepka yemo njine korop don iwa detwarekei, onoka wane, naso qoeakane bomileki, yewao nej natne gege mageene borikine mama wane qom riweņo watke watkine eņe baņ wakonikei. Wakone more eņe baņ mabaik qebaik njbukei. <sup>4</sup> Paki rakei, “Yesu eņe sariakane rake me? No eņe diawa sarimaike? Nenane magakopze eņe mo seuk warekoi, no yeye kine kine iwa yemo mokaka kepe mawakongi paki motke, rokop weku yewaka pa samaike!” <sup>5</sup> Eņe edom kelok kine dere more koso ra okanmami, Anutu wane ra okanmami, “Nene qauze wamaike,” mokaka Anutuņo rakiso, qeli so kepe ere wakongoik. Kepe eņe Anutu wane donņo dokuoņine raki wakonge paki, dokuņo qeatkaki keuo pake. <sup>6</sup> So doku yewa wane qakum eaņo yaleka nej njerep so kepe sogine ea korop ma qorok ongi mida warekoi. <sup>7</sup> No qeli so kepe ukude iwa pamamik,



yemo Anutu wane don wekujoka mawaluk otki, gerepno eso matali osiakane binjek pamamik. Ere wareotki pamamik, ban naso bomileake, eao nei borikine Anutu midaine gemami, kineene ma wakone more matalioniake.

<sup>8</sup> Kima maepkopne, don weku iwa yemo misuk nigetjuniake! Waom wane deino yemo ene kaki kaiwe weku so koma tausen ere kine mane kine mane mi okanmamik. Enano yemo kaiwe weku ea koma 1, 000, so koma 1, 000, ea kaiwe weku, etke ere rokop wekuka okanmamik. <sup>9</sup> Waom ene don rake, ea wane njanaki paki, naso mi ma kirowone okanmaike, nei natne njine yale mane desikeiwane. Ea wane turujine yemo ene njine bororom okanjan okanmaike, onoka wane mida, ene nei natne midakeiwane mi det okanmaike, ea wane, no silun ene koso nei korop wetene maingeu paki, borikine ndekakei wane ra okanmaike.

### *Qeli So Kepe Mida Lelekeik*

<sup>10</sup> No Waom wane nasono yemo ban kobu mama nei maneno kobu mayakane sanku ari okanmaike, yale sanku ture njoniake, kaiwe naso yewao qeli ene ukatne suaine ma more siuke mida leleake, qeli wane yeye kine kineine eamo gerepno ezo wareki mida sololokkei, so kepe ene yeye kine kineine kutno pamaike, earop wenen siuke mida leleake. <sup>11</sup> Yeye kine kine korop ea numa yalewaoken okangi siuke midawarekei. No nei njerep njine daleo okane gekei? Njine gegenine koboine geu paki, Anutu sunka manikei. <sup>12</sup> Njine Anutu wane Kaiwe naso yewa tomaka geu, paki sorin borin okane mau naso bomile sariake,

Kaiwe naso yewao qeli ene gerepņo zewareki mida leleake, so qeliwane kine kineine yemo gerep aņetneņo korop kaki yanyale more mida lele ariake. <sup>13</sup> No ņene yemo Anutuņo qeli musele so kepe musele mane ea wane biņek qe ņebonge, ea wane tomaka gemaine, yewao koboboine gege togon matzo gekene.

<sup>14</sup> Ea wane kimakopne, ņine Kaiwe naso ea tomaka geu paki, kotoņine warekau gunule payake, so sot midaine Anutu wane kaitko eņerop peamgo gekei. <sup>15</sup> Waomzeņo sese ņunmaike ea kau, eamo koso masuluk ņuniakane numa ea more ņibonmaike, eamo kima maepze Paulo Anutuņo wet dereret mange ea ma more, ea wane rokopka ņine qe ņibonge. <sup>16</sup> Kibiine qeke, eao eņe korop don iwa waneka ramaike. Kibiine qeke, eao don natne umatne pamaike, wane don yaline ea ņei qelaņine so borotne eņe kine ra siuk okanmami, so eņe Anutu wane Papia natne pamaike, eao don natne ea yaleka ra siuk okanmami. Yale okanbi paki, edomka matali qetali okane, ea tebakau sari turuņņo kuteno wa okanmaike.

<sup>17</sup> No ņine, kimakopne, iwa yemo mo derimi, ea wane ņine diamņine togogle makei, yale okanbi, ņei yau yaup gegine eņane isi donņo ņine misuk waraņņungi numaņine mayakatne ea qeliņka arikei. <sup>18</sup> ņine takotke more Waomze so Mapi Mapikze Yesu Kristo wane wet menaņ so kineine detlukeu paki sua togole warekei, Kristo wano qeli ewe zonom, ea iwa pamanmaike so banine pa ariake! O, Weleka.

**Waom Yesu Wane Sigi Maep Don**  
**The New Testament in the Ono Language of Papua**  
**New Guinea**  
**Nupela Testamen long tokples Ono long Niugini**

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files dated 22 Nov 2019

646541a1-8d36-5993-802c-6bb850da5963